

甘肅全省新通志

卷柒拾伍

甘肅新通志卷之七十五

隱逸

易曰不事王侯高尚其事若嚴子陵雖不爲光武屈然東漢節義實子陵高風激勵成之隱逸亦何負於人國哉甘省自逸民賢聖著節首陽士之抱道自重者聞風興起以降志辱身爲恥又或名山著述匿迹銷聲若秋水伊人可望而不可卽此蒹葭詩詠於秦風也志隱逸爲假終南捷徑者愧云

蘭州府

元官卓斯結狄道人重喜長子性靜退辭官閒處二十餘年仁宗聞其名召不起子德壽雲南左丞

明周 詢金縣人辭榮棄祿隱居養親日以詩文自娛足以表正鄉閭焉

甘肅新通志

卷七十五

人物志 隱逸

一

漢 德金縣人隱居不仕絕迹名利尤遠避權勢鄉人以孤清高潔稱之

王伯良字志善蘭州人潛心義理之學言動不苟取與必以義不妄交人不干謁貴顯著書見藝文目錄

田 樂字德民狄道人濟順裔髫年頓異有高尙之志嘗隱居南山以山水文籍自娛年八十六卒

王 中字仲可臨洮人別號井天迂叟世耕讀不干仕進日以詩文自娛肅藩辟爲教授不就所賜金帛亦卻之後隱居玉井峯下洮人或傳以爲仙著書見藝文目錄

張 勗字士勉臨洮人別號率一處士少有學行郡諸生多出其門嘗隱居玉井峯以高士王中爲師年九十無疾而終

雍 謂字士傑臨洮侍御公焯之祖也夙習引年術自號竹園散

人蕭然世外品節甚高祥符令段顧言嘗屬平山張路作竹園幽居圖李川父濂爲之題詩

王厯元字燮之號主一臨洮人補郡學生幼隨父任朝邑即雅志理學雖日肄舉子業每取濂洛關閩之書以自訓法一言一動惟以古人爲準學術深奧宿儒莫窺一時郡中名士多出其門其所著作悉爲洮士典型太守某表其門曰理學真儒司李某表曰德高千古

劉 緒字子承臨洮人隱居東山給事中張萬紀恆與之游時相唱和

張 溥靖虜衛人太學生卒業太學及歸樂於園林以花木自娛絕意仕進卒年八十有三

來 錦靖虜衛庠生少孤貧刻苦勤學母卒遂業農教子寡交游
甘肅新通志 卷七十五 人物志 隱逸 二
足不履城市鄉人推重嘉靖二十年學宮以鄉評薦鄉飲賓屢讓不出

國朝袁養浩字義生狄道人明諸生幼有大志下帷奮勉銳意功名及李自成之變遂謝衣冠躬耕養親讀書教子怡然自得壽八十餘卒有著作藏於家不傳

沈 溥字時泉狄道人讀書不求聞達隱居教授足不入城市者二十餘年學使許振禕旌其門曰儒林架燹著書見藝文目錄

平涼府

明孫一元字太初平涼人嘗棲太白之巔故號太白山人善爲詩風姿秀朗攜鐵笛鶴瓢遍遊中原齊魯南涉江淮吳越時劉麟以知府罷歸龍霓以簽事謝政並客湖州與郡人陸琨吳充招一元入社稱苔溪五隱舉人施侃勸之娶乃妻以妻之妹張氏生一女而卒充等葬之太白陽有太白山人傳

國朝單好問平涼人回紇之裔也弱冠補博士弟子員性沈靜工詩能文不慕榮利而尤嗜理學聞整厓李二曲名卽負笈往從歲餘學益進撫院殷某見其詩奇之延爲西賓久之殷益敬禮欲官之辭弗就嗣殷晉大學士同居京師數年潛心著述旣而歸里閉門謝客興至輒往崆峒所作夜坐詩十首見者謂有月到天心風來水面景象

涇州直隸州

漢王 符字節信安定臨涇人少好學有志操與馬融張衡崔瑗等友善當途者更相引薦而符獨耿介不同於俗隱居著書以議當時得失後度遼將軍皇甫規解官歸安定鄉人有爲雁門太守者去職還家謁規臥不迎有頃白王符在門規驚遽而起衣不及帶屣履出迎接符手而還與同坐極歡時人爲之語曰徒見二千石不如一縫掖言書生道義之爲貴也符著書見藝文目錄

石得林安定人建安初客三輔就學於宿儒樂文博始精詩書後好學靜默關中亂南入漢中不治產業不蓄妻孥常讀老子晝夜吟詠漢中破還長安人與不取問姓氏不言

唐牛意仁字行恭安定鶉觚人大父通秉志守道交辟不起仁樂道邱園屢空宴如或勸之仕但笑而不答開元六年卒於伏羌官舍

甘肅新通志

卷七十五

人物志 隱逸

四

以子仙客贈涇州刺史

國朝于凌霄靈臺人崇禎庚午舉人任山東陽穀知縣因寇變歸堅志林泉養親終老學問淹貫博洽尤以孝友聞 國朝定鼎徵召遺賢府縣以凌霄應辭不赴

鞏昌府

周伯夷叔齊孤竹君之二子當紂時兄弟遜國聞文王善養老乃入周就養及武王東伐紂叩馬而諫至周有天下伯夷叔齊恥之不食周粟隱於首陽山采薇而食餓死按曹大家注幽通賦云隴西首陽縣有首陽山邑人楊恩有首陽辨

漢姜 岐漢陽人抱道隱居名著西州太守橋元欲召爲吏岐稱疾不就詳見秦州隱逸

王 曼祖厲人

漢史載元城人

故繡衣御史賀之孫也漢宣帝元康元年

其姊政君入宮族多貴顯惟曼避居祖厲南九十里以耕牧自樂

屢徵不起卒於家其子卽莽

今縣南十五里有王曼耕牧莊

晉朱 冲字巨容南安人少有志行閑靜寡欲鄰人失犢認冲犢以歸後得犢大慙以還冲冲竟不受有牛犯其禾稼冲屢持芻送牛

甘肅新通志

卷七十五

人物志 隱逸

五

而無恨色主愧之乃不復爲暴咸甯四年詔補博士不應冲每聞徵書輒逃入山時人以爲梁管之流冲居夷俗羌人奉之若君冲亦以禮讓爲訓邑里化之道不拾遺村無凶人毒蟲猛獸皆不爲害云

董 京字威輦初與隴西計吏俱至略陽披髮行吟常宿白社時乞於市得殘碎繒絮結以自覆或見人排辱曾無怒色孫楚時爲著作郎數就社中與語遂載與歸京不肯坐楚貽之書京答以詩後數年遁去莫知所之

元萬敬儒甯遠人家貧嗜學不倦與人說書輒竟日棲止東郊畫水竹以自娛忽報朝使至抱琴踰垣而走不知所終

明王 輔安定諸生博極羣書應貢入京遂隱不出講學於木坡諸生重趼往從之講論經史數十年不入城府縣令黃沂請爲鄉飲

賓輔笑謝之至今鄉人稱儒者高蹈必以輔爲首

劉 林安定人永樂閒舉明經判徐州有廉聲兩遭誣謫不改操子武懲前禍誓不仕舉賢良方正不就且不欲以舉業授其子晟張世爵安定人生而穎異日誦千言甫成童五經悉記尤邃於詩以親老絕意仕進詩師李獻吉楷書遒勁尤工草書善畫菊自號爲東皋子著書見藝文目錄

王 琴伏羌人結茅於沙溝之南自幼至老足迹不履城市流賊夜過以礙路欲殺之琴以數語感動賊遂遠避不復至其境云
王 僕會甯蒙陰丞惟真子鄉賢綸之孫也性孝友繼母何氏病篤嘗籲天願以身代母病獲瘥少從都憲胡某學舉子業補弟子員頃之乃曰吾祖吾父宦遊齊晉世以清白傳家吾一經之債未酬固當仰承先志顧近時參佐卑秩奔走上官前不啻僕隸昔陶

甘肅新通志

卷七十五

人物志 隱逸

六

淵明恥爲五斗米折腰吾安能以區區富貴而芥蒂哉遂謝進取退居敷川山村嘯傲南山樂琴書講熊經鳥甲之術洞澈元微王應麒通渭人正德庚午舉於鄉容止端莊議論侃侃無迴避銓曹授以司務職固辭棲遲於東野之鄉詩文自娛不求仕進
張山人佚其名通渭人隱居縣東南確兒峽其地有張仙人洞世傳有一老叟鶴髮童顏白云張姓不道其名曰在洞中讀書音韻朗然興發題詩於石壁植花種藥徧洞口每有奇種後竟不知何往至今石壁上有詩以水拭之墨迹如新洞前有草莖如竹根葉如銅綠採而乾之投熱水中其色鮮翠如初

國朝曹如淵號摩天通渭人入庠後終身不試性嗜山水善丹青好寫鍾馗像或按劍或瞋蝠或束帶揀書或怒目抉怪種種奇絕興會淋漓大筆揮灑立時而就每一幅出貼壁閒遠視大呼云鍾進士

鍾進士吾爲若揚眉吐氣驅埽不平也嘗與邑令牟某交契晉接
多不拘禮牟奇之後牟遷至河南布政司署巡撫招如淵如淵不
往雅慕吳越山水散步往遊北至燕趙閒徧覽名山大川居京師
嘗夜醉不就旅邸獨宿關廟門前夜暴雨如注雷電震驚如淵秦
然自得後歸里不與俗爲伍興動卽寫山水自娛卒年七十餘其
字畫至今士大夫家猶有珍藏者

秦州直隸州

漢韓順字子良天水成紀人以經行清白辟州宰不詣王莽未隱於南山順同縣隗囂等起兵西州大震惟順修道山居執操不回囂使人齎璧帛聘順欲以爲師順謝曰禮有來學義無往教卽欲相師但入深山來囂矍然不敢強屈

東漢任棠字季卿漢陽人少有奇節隱居教授太守龐參到官先就家候之棠不與言但以薤一大本水一盂置戶屏前自抱孫兒伏於戶下參思其微意良久曰棠是欲曉太守也語詳大吏龐參傳詔徵不至及卒鄉人圖畫其形至今稱任徵君也

姜岐字子平上邽人治書易春秋守道隱居名聞西州漢陽守橋元召以爲吏稱疾不就元遣人偪致之仍堅卧不起元亦無可如何岐母喪畢盡讓平水田於兄岑以畜蜂豕爲養教授者滿天

甘肅新通志

卷七十五

人物志 隱逸

八

下營業者三百餘人辟州從事不詣民從而居者數千家後舉賢良辟茂才皆不就

趙壹字元叔漢陽西縣人也體貌魁梧望之甚偉而恃才倨傲爲鄉黨所擯乃作解擯光和元年舉郡上計到京師時司徒袁逢受計計吏數百人皆拜伏庭中壹獨長揖而已逢望而異之令左右往讓之曰下郡計吏而揖三公何也對曰昔酈食其長揖漢王今揖三公何遽怪哉逢乃下堂執其手延置上坐因問西方事大悅顧謂坐中曰此人漢陽趙元叔也朝廷莫有過之者往造河南尹羊陟尚卧未起壹逕入上堂臨之因舉聲哭門下皆驚陟知其非常人乃起延與語大奇之陟明日大從車騎造壹時諸計吏多盛飾車馬帷幙而壹獨柴車草屏露宿其旁延陟前坐於車下遂興言談至曛夕極歡而去日良璞不剖必有泣血以相明者矣陟

乃與袁逢共稱贊之名動京師及西還道經宏農過候太守皇甫規門者不卽通壹遂遁去州郡爭致禮命十辟公府並不就終於家著書見藝文目錄

晉楊軻天水人易學精微養徒數百嘗食簞衣褐悠然自得然受業者非入室弟子莫得親言劉曜徵拜太常固辭不起隱於隴山及石季龍嗣僞位備束帛安車徵之軻以疾辭迫之乃發旣見不拜與語不言命舍之於永昌乙第季龍每有饋餼輒口授弟子使爲表謝其文甚美季龍欲觀其真趣乃密令美女夜以動之軻蕭然不顧又遣壯士臨之以兵並劫其所賜衣服軻視而不言了無懼色嘗土牀覆以布被下無茵褥潁川苟鋪造而談經發軻被露體坦然無驚怒之狀於時咸以爲焦先之徒未有能量其深淺也後上疏求還季龍送以安車蒲輪蠲千戶供之旣歸仍教授不絕

甘肅新通志

卷七十五

人物志 隱逸

九

北魏李茂字仲宗鎮北將軍李寶子也高祖時歷長安鎮將西兗州刺史光祿大夫性謙慎以弟冲寵盛託疾固請遜位因居中山優游以卒舅子范陽盧思道嘗贈詩云水衡稱逸人潘陽有世親形骸預冠蓋心思出風塵時人以爲實錄

宋崔嘉彥字子虛成紀人少慷慨有奇志壯歲因亂避地巴東修神農老子術後東至吳越以耕戰策說趙鼎鼎是之會鼎罷相不果行因入廬山得西原庵故址築室以居耕田種菜僅足自給而四方往來之士皆取食焉其疾病老孤無歸之人亦收養之年逾七十神明筋力不少衰朱子往見無一言及外事惟道說平生太息而已朱子爲作西原庵記其卒葬則不可考云

國朝萬掄字穎先秦州人四歲時卽能斷文契之句比就傅博通經義旁涉孫吳書稍長挾書走河西詣靖逆侯提督張勇上謁勇壯

而留之與幕下奇士宋石之遊盡得其天文地理孤虛營陣之學時勇以收復隴右功得專置守宰命掄以軍功攝縣令掄固辭但受幣歸歸乃補州學生員食餼貢國學然父母已前卒遂潛居不仕當道以禮招之亦不往有就問天文兵法者終不以告曰儒者方講孔孟書安事此也

路道庸秦安人明末諸生父坦然入國朝應試以貢生仕至福建延平府知府道庸值鼎遷後素服野處北望涕泣既乃服道士服終身自號天中子書法逼真鍾繇時人得其墨蹟珍如拱璧胡多瑞字輯五秦安人性穎而剛以選拔赴銓抵京胥吏少有需索卽憤志歸終身不復仕

劉鈞字樂天秦安蓮花城人道光己酉舉於鄉性極狷非其人不肯與交與同門巨潭相友善嘗以黃表錄所作示潭囑閱後付

甘肅新通志

卷七十五

人物志 隱逸

十

火毋令他人見或邀與聯名留長官去任不赴有詩云從無遼豕堪誇白豈有山雞不愛毛其介如此家無擔石處之宴如主講景泉書院所獎拔皆才雋士其卒也貧無以殮門下士醵金以葬而劉淵之力居多淵字泉如入庠後舉優行早卒士論惜之

邢可法徽縣人康熙十一年以選拔肄業成均期將滿聞母病徒跣而歸母亡遂有謝世志曰祿不及親又何爲哉於是優遊鄉里專以教授著述爲務當事屢徵不起

張思敬徽縣貢生雅有鑑識每讀書至安危得失忠臣烈士未嘗不商略品第郡守下車每就其廬而就質焉晚年好習靜一室不與人交接卒之先以家事分屬諸子畢翌日整飭衣冠端坐而逝著書見藝文目錄

階州直隸州

唐同谷子同谷山逸人自稱同谷子不顯姓名天復中昭宗播岐時何皇后恃寵好畋遊同谷子戴巨笠跨青牛直詣朝上書論十代興亡之事敘四方理亂之源帝覽其書數日減膳使驃騎賜之酒食審其賢愚同谷子惟吟太康失政之詩說褒氏惑君之事何后慮失寵潛令秦王誅之事未行而預已奔去昭宗還京使人招之又逃去恐其迫也隱姓名爲漢陽人灌園

明龍 正階州人幼英敏過人精易學遇金牌道人傳授六壬占驗多應正德壬申蜀寇猖獗都御史召之贊畫每戰多捷番夷入寇總督聘居帷幄出奇數勝欲授以官不受奏賜金帛冠帶後總督楊張鄧徵聘皆不就著書見藝文目錄

國朝趙定鼎字荆山成縣貢生家貧少孤篤志勵行能自開益授褒城

甘肅新通志

卷七十五

人物志 隱逸

十一

訓導以力衰不就善手談喜山水擇居幽僻絕迹塵市年八十九而卒

李 湄字正叔成縣人以詩經歲薦性閒淡寡營不急仕進成就後學其伯甲璧以淮安通判告歸湄相與徜徉山水有竹林二阮風晚年垂釣裴湖吟詠自適云

武運昌字建泰成縣明經嘗結茅亭於黃龍潭畔陶然自遂後授耀州訓導甘於林泉不就壽百歲

慶陽府

元吉 莘不知何許人今有元時碑碣在者自題曰隱士云
明楊 博字守約安化人神清氣健生平無書不讀耽於六書楷篆
雙絕空同李夢陽雅重之以歲貢除解州州判因母老陳情西歸
於屋後建背郭堂一區蒔花種竹高卧吟詩尚友古人人以羨門
王養目之一時名卿郡大夫咸折節下之壽九十餘而終尚書張
珩常親自存問復爲之銘其墓

曹 琬字廷圭慶陽衛人家貧折節讀書積數千卷教授自給來
學者衆坦易出於天性卽田夫野老有問務愜其懷嘗自謂曰古
人知足不辱知止不殆今不據現在者以爲足吾恐於當止者不
能止矣貢於廷乃曰吾豈不自知吾非牧民才豈可虛糜爵祿以
重吾過耶今者之來特以了吾讀書事耳因上書求歸蒙嘉澹退

甘肅新通志

卷七十五

人物志 隱逸

十一

有冠服之錫抵家日與鳳川諸友爲山林游陶然自樂者二十年
胡廷燧甯州人舉於鄉授道州訓導賦性廉直恥依阿澆忍之所
爲旋卽致仕歸優游林泉教授生徒澹如也人稱其高尚
谷中仁安化人以通判致仕家居四十五年黃冠野服日以種菜
蒔花爲事壽踰髦期器宇灑落翛翛若神仙中人

國朝龐國柱安化人爲諸生時以德行舉後知懷仁縣致仕歸隱居林
溝山中教子耕讀嘗持準提一冊若游世外蓋深於禪而不泥於
禪者年七十有五神采若少壯人

李 幹環縣人歲貢賦性聰穎持已清介詩詞藝文爲鄉人推重
後怡真樂退居方山不求聞達

樊騰霄甯州人明舉人授昌黎令耿直不阿解組歸適闖逆陷城
脅授以官不應搥拷備受 國朝定鼎隱居荆村山灌園種菜作

詩文以自娛

栗挺周甯州人庠生性瀟灑前明鼎革後居鄉僻奉親養志以終

甘肅新通志

卷七十五

人物志 隱逸

十三

甯夏府

國朝張應賦甯夏衛庠生雲貴總督張文煥之父有高行甘淡泊文煥已授大同總兵而應賦仍教授生徒褐衣粗食不厭康熙二十六年上西巡甯夏應賦藍衣跪接上眷顧之日眞儒士也書雲林幽三字以賜

楊毓芳字子實甯夏縣廩生居鎮河堡性至孝務實修屏迹田園志希濂洛澹然聲華之場三十五歲父母相繼亡廬墓五載學臣周某按試本郡士人以孝行博學共舉優生將貢成均毓芳謝曰身爲人子不能揚名顯親不可謂孝身當盛世猶且食貧居賤不可謂才不孝不才何優之有力辭不就終身隱居教授著書見藝文目錄

史世宜甯夏人貢生釗之後隱居課誦力耕自給或以其家世勳

甘肅新通志

卷七十五

人物志 隱逸

十四

伐宜求仕進不樂也郡人高其學品師事者甚眾兄世表爲靈臺訓導亦有文望鄉人稱二夫子焉

楊中時字庸齋甯夏人幼孤貧事母孝敬長悌爲縣學生隱居治園圃養花種樹以自適雍正六年議展漢渠溉查漢托護地而沿渠居民廬舍墳墓多被侵占當遷中時率士民請由河灘空闊處別開渠引流具呈懇訴辯論至再至三當事者不能奪竟從其請開今惠農渠廬墓獲全者甚衆鄉里至今感其德

冀立志甯夏廩生好學博覽羣書精於醫理回亂入營屢得保獎絕意仕進閉門讀書高尚其志

楊文孟平羅人閉戶讀書夙負奇志弱冠後澹於仕進遂隱居邑城之北樓卒稱靖懿先生

趙飛熊字渭占平羅諸生世居李剛堡性豪逸詩酒徜徉不求仕

進有田百畝率子耕耘供八口衣食屋後闢一園可數畝號西園
徧植花卉果木朝夕玩賞吟詠其中以所出給賓朋蔬酌之用又
駕牆起樓顏曰曠逸高出叢林時挹西山爽氣詩體初好晚唐暮
年進而益上著書見藝文目錄

西甯府

漢樊志張本南鄭人嘗遊隴西至湟中博學多通隱身不仕桓帝延
熙七年護羌校尉段熲擊當煎勒狽種用志張策大破首夷數千
遂窮追之展轉山谷閒無日不戰夷遂饑困敗散論功封熲都鄉
侯以狀表聞有詔特徵會病終

國朝王老實不知何許人也亦不詳其名字甯人因其老實故以爲號
焉康熙四十年來甯借居紫峰觀每手持一卷書不言世事未幾
抵甘州居興福觀之水土祠作書託致紫峰觀道士元日觀主出
見水土祠有火趨進光漸漸斂而留棲之人正坐而逝觀主持遺
書訴於官移詢西甯衆皆以爲仙去云

樊尊義貴德人博學能文教授生徒隱身不仕終身不入城市

涼州府

明盧 訪字博齋鎮番人游擊鑛子崇禎十六年由功貢授河南獲嘉縣縣丞旋擢知縣後因闖變回籍隱居城之西鄙讀書啟後與當道不通名刺年八十餘卒於家子士鷗入 國朝由歲貢官成縣訓導

許從孟字浩然鎮番人崇禎時功貢鼎革後不忍薙髮棄其妻子遠遁不知所往

國朝白 昭武威人歲貢生讀書求實際泊然寡營嘗危坐經旬月容寂神專人至相目爲癡乾隆初 詔舉孝廉方正有司以昭薦辭不就 有司高其義薦益力昭於是逃避且不知所往粵西歐陽永琦宰武威時慕昭學師事焉政事之暇詣其家請業執弟子禮惟謹昭於修己治人之理剖陳無遺義而不一語及公事終永琦去

甘肅新通志

卷七十五

人物志 隱逸

十七

武威昭未嘗往見

吳振業武威人始業農乾隆戊子舉於鄉性樸略不樂進取試禮部不第絕迹城市且不與朋輩往還衣常至髡雜耕夫坐起或負暄弄孫載歌載笑客問振業何不出仕則曰人生幸逢太平樂太平足矣官胡爲乎閉目不復與言

劉 誥字聖書武威人爲秀才有名常游學關中名漸起而性孤峻不樂與富貴人交閉門不通雜客日惟飲酒彈琴自娛晚益窮或經旬卧不起有老友來與之飲陶然輒醉如言及外間酬酢與一切世務誥則以被韜面不復答比沒何翰林承先弔酌酒木主前呼其子澄原將琴來爲奏悲麟泣鳳之操曲終大哭而去

武 瓚字用侯武威人庠生父克勤官臺灣游擊死海寇難傳見忠節道光初 詔舉孝廉方正郡以瓚名上甘涼道某欲面試瓚

走匿且使人具劄辭曰三四上甘涼道某知不可強乃飭有司額其門既又授意瓚之友諷令往見亦謝弗應也

王乃憲平番人隱居苦水朝陽山下名公鉅卿召之不就創爲栽稻漚靛種桑養蠶諸務因名其村曰樹桑年逾八十猶手不釋卷至八十九一夕忽起端坐而逝

甘州府

國朝王孫謙字珊苔張掖諸生善琴家無立錫地終日抱琴枯坐不復與世爲緣乾隆閒陝西巡撫畢沅耳其名以禮招至青門嘗受學焉詳見藝文小傳

申理號蓮山嘉慶時鴨子渠人幼穎悟經目成誦淹貫古今學有根抵不屑攻章句兼精醫術遇危疾輒應手愈鄉里有爭鬪疑難等事力排解之靡不冰釋年六十餘沒

李大賓字見亭道光初明麥渠武生性倜儻事親以孝聞友于兄弟勸子弟者必曰當如見亭先生隱於農暇則臨池自娛偶一揮毫動與古合不屑規摹形似其作畫亦如之

何鋤以營卒從兆將軍征回虜失陣困喜坡外無救援軍乏糗糧將軍令堅壁弗戰困久人將相食鋤與衆兵謀夜以大礮衝賊

甘肅新通志

卷七十五

人物志 隱逸

十九

官軍聞礮赴援始解圍主帥賜之爵不受及凱旋賜官又不受

肅州直隸州

晉索 統字叔徹敦煌人少遊京師受業太學博綜經籍爲通儒明陰陽善術數占候司徒辟除郎中以避亂歸凡所占夢靡不驗太守陰澹從求占書統曰昔入太學因一父老爲主人其人無所不知有似隱者統因從父老問占夢之術審測而說實無書也澹命爲西閣祭酒統辭曰少無山林之操遊學京師交結時賢希申鄙藝今中國不靖欲養志終年老亦至矣不求聞達又少不習勤老無吏幹濛汜之年弗敢聞命澹以束帛禮之月致羊酒年七十五卒於家

甘肅新通志

卷七十五

人物志 隱逸

二十

